

婦人

玉

機

微

義

不

王機微義卷之四十九

婦人門

○論經閉不行

內經陰陽別論云。二陽之病發心脾。有不得隱曲。女子不月。其傳爲風消。爲息賁者。死不治。東垣曰。婦人脾胃久虛。或形羸。氣血俱衰。而致經水斷絕不行。或病中消胃熱。善食漸瘦。津液不生。夫經者。血脉津液所化。津液既絕。爲熱所燦。肌肉消瘦。時見渴燥。血海枯竭。病名曰血枯經絕。宜瀉胃之燥熱。補益氣血。經自行矣。此證或經適行而有子。子不安。爲胎病者有矣。或心包脉洪數。燥作時見。大便秘澀。小便雖清。不

利而經水閉絕不行。此乃血海乾枯。宜調血脉。除包絡中火邪。而經自行矣。內經所謂小腸移熱於大腸。爲痔瘻。爲沉。月澁不利。則月事沉滯而不利。故云爲痔瘻。爲沉也。或因勞心。心火上行。月事不來。安心補血。瀉火。經自行矣。故內經云。月事不來者。胞脉閉也。胞脉者。屬心而絡於胞中。令氣上迫肺。心氣不得下。故月事不來也。曾治驗裴澤之夫人。病寒熱。而月事不至者數年矣。已加喘嗽。醫者率以蛤蚧桂附等投之。曰。不然。夫人病陰。爲陽所搏。溫劑太過。故無益而反害。投以涼血和血之藥。則經行矣。已而果然。

要略曰。婦人之病。因虛積冷結氣。爲證。經水斷絕。至

有歷年血寒。積結胞門。寒傷經絡。凝堅在上。嘔吐涎唾。久成肺癰。形體損分。在中盤結。繞臍寒疝。或兩脇疼痛。與臟相連。或結熱中。痛在關元。脉數無瘡。經候不勻。今陰割_手癰。少腹惡寒。或引腰脊。下根氣街。_{云云}

謹按良方言。婦人月水不通。由勞傷血氣。致令體虛。受風寒邪氣。客於胞內。損衝任之脉。并手太陽少陰二經。致胞絡內血絕不通。如以上病機。皆略之不議。且血病經閉。又豈止手太陽少陰二經耶。然亦有不因寒熱。或痰飲積聚。疝瘕所致。如七情所動。其為氣病。血從一也。况陰道常虛。不足者。實多。宜翫血證門。血屬陰。難成易虧論。及後丹溪先

生等說。

○論經水不調或紫或黑

丹溪曰。經水者。陰血也。陰必從陽。故其色紅。稟火色也。血爲氣之配。氣熱則熱。氣寒則寒。氣升則升。氣降則降。氣凝則凝。氣滯則滯。氣清則清。氣濁則濁。上應於月。其行有常。名之曰經。爲氣之配。因氣而行。成塊者。氣之凝也。將行而痛者。氣之滯也。來後作痛者。氣血俱虛也。色淡者。亦虛也。而有水混之也。錯經妄行者。氣之亂也。紫者。氣之熱也。黑者。熱之甚也。今人但見其紫者。黑者。作痛者。成塊者。率指爲風冷乘之。而行溫熱之劑。禍不旋踵矣。良由病源論月水之病。皆

曰風冷乘之。宜其相習而成俗也。或曰黑者北方水之色也。紫者黑之漸也。非冷而何。予曰經云亢則害。承乃制。熱甚者必兼水化。所以熱則紫。甚則黑也。況婦人性執而鄙。嗜欲加倍。臟腑厥陽之火。無日不起。非熱而何。若曰風冷。必須外得。設或有之。吾恐十百而一二也。

按此論經病甚詳。大抵不得率指爲風冷所乘者。此由良方所言。世俗往往因之誤人。故戒慎之也。然冷證外邪。初感入經必痛。或不痛者。久則鬱而變熱矣。且寒則凝。既行而紫黑。故非寒也。

○論經漏不止

內經陰陽別論云。陰虛陽搏謂之崩。東垣曰。婦人脾胃虛損。致命門脉沉細而數疾。或沉弦而洪大有力。寸關脉亦然。皆由脾胃有虧。下陷於腎。與相火相合。濕熱下迫。經漏不止。其色紫黑。如夏月腐肉之臭。中有白帶者。脉必弦細。寒作於中。中有赤帶者。其脉洪數。疾熱明矣。必腰痛。或臍下痛。臨經欲行。先見寒熱往來。兩脇急縮。兼脾胃證出見。或四肢困熱。心煩不得眠卧。心下惡。宜大補脾胃。而升舉血氣。可一服而愈。或人故貴脫勢。人事疎少。或先富後貧。心氣不足。其火大熾。旺於血脉之中。又致脾胃飲食失節。火乘其中。形質肌肉容顏似不病者。此心病者。不行於診。

故脾胃飲食不調。其證顯矣。一經水不時而下。或適來適斷。暴下不止。治當先說惡死之言。勸諭令生。死而心不動。以大補氣血之藥。奉養脾胃。微加鎮墜。心火之藥。治其心。補陰瀉陽。經自止矣。痿論云。悲哀太甚。則胞絡絕。胞絡絕。則陽氣內動。發則心下崩。數溲血也。故本病曰。大經空虛。發則肌痺。傳爲脉痿。此之謂也。

良方論曰。婦人崩中。由臟腑傷損。衝任血氣俱虛。故也。衝任爲經脉之海。血氣之行。外循經絡。內榮臟腑。若無傷損。則陰陽和平。而氣血調適。若勞動過多。致臟腑俱傷。而衝任之氣虛。不能約制其經血。故忽然

暴下。或由陰陽相搏。爲熱所乘。攻傷衝任。血得熱則流散。甚者至於昏悶。其脉數疾。小爲順。大甚者逆。按此備言經脉致病之因。本於臟腑傷損。合前東垣所論。極言因熱因虛。或悲哀七情等所致。病機殆無餘蘊矣。

○脉法

脉經曰。尺脉滑。血氣實。婦人經脉不利。○少陰脉弱而微。微則少血。少陰脉滑而數者。陰中則生瘡。○寸口脉浮而弱。浮則爲虛。弱則無血。○脉來至狀如琴弦。若少腹痛。主月水不利。孔竅生瘡。○肝脉沉。主月水不利。腰腹痛。○尺脉來而斷絕者。月水不利。○寸

關調如故。而尺脉絕不至者。月水不利。當患小腹引腰痛。氣滯上攻胸臆也。○經不通。繞臍寒疝痛。其脉沉緊。此由寒氣客於血室。血凝不行。結積血爲氣所衝。新血與故血相搏故痛。○漏血下赤白。脉遲者。脉小虛滑者。生。急疾者。大緊實數者。死。○暴崩下血。寸口脉微遲。尺脉微弦。微遲爲寒在上焦。但吐爾。今尺脉微弦如此。即小腹痛。引腰脊痛者。必下血也。○寸口弦而大。弦則爲減。大則爲亢。減則爲寒。亢則爲虛。寒虛相搏。脉則爲革。婦人則半產漏下。○尺脉急而弦大。風邪入少陰之經。女子漏自下赤。○漏下赤白。日下血數斗。脉急疾者。死。遲者。生。○尺寸脉虛者。漏

血漏血脉浮不可治也。

○論赤白帶下

機要云。赤者熱入小腸。白者熱入大腸。其本實熱。冤結于脉不散。故爲赤白帶下也。冤。屈也。結也。屈滯而病熱不散。先以十棗湯下之。後服苦楝丸。大玄胡散。調下之。熱去濕除。病自除也。

按此正是論有餘之證也。論見下

良方論云。帶下起於風氣寒熱之所傷。或產後早起不避風邪。風邪之氣入於胞門。或中經脉。流轉臟腑而發下血。名爲帶下。若傷足厥陰肝之經。其色青如泥。傷手少陰心之經。其色赤如紅津。傷手太陰肺之

經其色白形如涕。傷足太陰脾之經則其色黃如爛瓜。傷足少陰腎之經則色黑如衄血。此其因也。

按此言風氣寒熱之所傷諸臟致證。似言外邪大抵此證多有本於陰虛陽竭。榮氣不升。經脉凝泣。衛氣下陷。精氣累滯於下焦奇經之分。蘊積而成其病。或醉飽房勞。服食燥劑所致也。白物如涕之狀。故言帶者亦病形也。經云帶脉爲病而得白。白者屬氣。赤屬血。東垣舉脉訣云。崩中日久爲白帶。漏下多時骨木枯。言崩中者始病血崩。久則血少。復亡其陽。故白滑之物下流不止。此可見未得全拘於帶脉矣。詳病亦有濕痰流注於下焦。或腎

肝陰淫之濕勝。或因驚恐。而木乘土位。濁液下流。或思慕爲筋痿。內經所謂二陽之證。發心脾是也。或餘經濕熱。屈滯於少腹小腹之下。而病本殊。則皆爲氣血虛損。榮衛之精氣累滯而成。其病標一也。前人立論。殆盡病機。則治法無定。若戴人以帶下。得兩手脉俱滑大而有力。乃上用宣去痰飲。下以導水丸。泄濕熱。經以淡劑滲之。此爲瀉實也。如其諸脉微細。或沉緊而澁。按之空虛。或洪大而澁。按之無力。正爲元氣不足。陰虛筋痿。虛極中寒等證。東垣有補陽調經固真等例。乃兼責虛也。丹溪先生治因濕痰下注。用海石南星椿根皮之類。較

之前人下之而復吐以提其氣。或發中兼補。補中兼利。燥中兼升發。潤中益氣。溫而兼收澁之例不同。蓋病機有輕重淺深之異爾。

○論師尼寡婦異乎妻妾之治

寶鑑曰。宋褚澄療師尼寡婦。別製方。蓋有爲也。此二種寡居。獨陰無陽。慾心萌而多不遂。是以陰陽交爭。乍寒乍熱。全類溫瘧。久則爲勞。史記倉公傳載濟北王侍人韓女。病腰背痛寒熱。衆醫多以爲寒熱。倉公曰。病得之欲男子不可得也。何以知。診得其脉。肝脉弦出寸口。是以知之。蓋男子以精爲主。婦人以血爲主。男子精盛以思室。女人血盛以懷胎也。如厥陰脉

絃出寸口。又上魚際。則陰盛可知。故知褚氏之言有謂矣。

○論胎產諸證

病機要云。治胎產之病。從厥陰經論之。無犯胃氣。及上二焦。爲之三禁。不可汗。不可下。不可利小便。發汗者。同傷寒下早之證。利大便。則脉數而已。動於脾。利小便。則內亡津液。胃中枯燥。製藥之法。能不犯三禁。則榮衛自和。而寒熱止矣。如發渴而白虎。氣弱則黃芪。血刺痛而用當歸。腹中痛而加之芍藥。大抵產病。天行從增損柴胡。雜證從增損四物。宜詳察脉證而用之。

謹按已上云胎產禁例。大抵主於原氣本病爲要。至於病體所因不同。學者又必當處於權變也。且胎前之證。良方悉具。但每證治例殊少。如胎漏胎痛。子煩。子腫等證。出方皆是治本病之例。設所因不同。或有所兼之證。如胎漏下血。亦有氣虛血熱。腹痛亦有濕熱者。或形志苦樂不一。七情所動。氣動血病。胎氣即損。雖治例未能以盡其變。然欲學者臨證。自推充而行之爾。今於諸證。未能一一悉具。聊以證治數例。附于後云。

○胎自墮論

丹溪曰。陽施陰化。胎孕乃成。血氣虛乏。不足榮養。其

胎則墮。譬如枝枯則果落。藤痿則花墜。又有勞恐傷情。內火便動。亦能墮胎。譬如風撼其木。人折其枝也。火能消物。造化自然。病源乃謂風冷傷於子臟而墮。此未得病情者也。予見賈氏婦。但有孕至三箇月。左右必墮。診其脉。左手大而無力。重則瀼。知其血少也。以其壯年。只補中氣。使血自榮。時正初夏。教以濃煎白朮湯。下黃芩末一錢。與數十貼。得保全而生。因而思之。墮於內熱而虛者。於理爲多。曰熱曰虛。蓋孕至三月。正屬相火。所以易墮。不然。何以黃芩熟艾阿膠等。爲安胎妙藥耶。